

**SAOPĆENJE POVODOM PRIVREMENOG OBUSTAVLJANJA FINANSIJSKE REVIZIJE
DRUŠTVA „PRETIS“ D.D. VOGOŠĆA ZA 2019. GODINU**

Godišnjim planom revizije za 2019/2020. godinu Ureda za reviziju institucija u FBiH planirana je finansijska revizija društva „Pretis“ d.d. Vogošća za 2019. godinu (u daljnjem tekstu „Pretis“).

Revizija „Pretisa“ najavljena je dopisom od 9. 12. 2019. godine, te je trebala početi 13. 1. 2020. godine. Međutim, tražena dokumentacija za obavljanje revizije nije dostavljena Uredu za reviziju, niti je omogućen pristup potrebnoj dokumentaciji. Zbog nastalog ograničenja djelokruga revizije, generalni revizor Ureda za reviziju donio je 15. 1. 2020. godine Zaključak o privremenoj obustavi finansijske revizije „Pretisa“, koji se nalazi u prilogu ovog saopćenja.

O prekidu revizije obaviješteni su Parlament FBiH, Parlamentarna komisija odgovorna za reviziju i Vlada FBiH, koji još uvijek nisu dostavili povratnu informaciju Uredu za reviziju.

Nadležno kantonalno tužilaštvo obaviješteno je o uočenim indicijama značajnog kršenja zakona nastalog usljed ograničenja djelokruga revizije, odnosno pristupa dokumentaciji Društva. Tužilaštvo je dostavilo obavijest Uredu za reviziju u kojem je navedeno da u opisanim radnjama nema obilježja krivičnog djela.

U skladu sa Zakonom o reviziji institucija u FBiH, izdati su prekršajni nalozi pravnom licu „Pretis“ i odgovornoj osobi Društva, zbog ograničavanja ovlaštenja Uredu za reviziju za prikupljanje dokumentacije.

Ured za reviziju i dalje očekuje povratnu informaciju nadležnih organa (Parlament FBiH i Vlada FBiH), kako bi se donijela konačna odluka o nastavku ili konačnom prekidu finansijske revizije „Pretisa“ za 2019. godinu.

Sarajevo, 27. 5. 2020. godine



Broj: 12-14-2265-1-7/2019
Sarajevo, 15. 1. 2020. godine

Na osnovu člana 21. stav 1. i člana 22. stav 2. Zakona o reviziji institucija u Federaciji Bosne i Hercegovine („Službene novine Federacije BiH“, broj 22/06), generalni revizor d o n o s i

ZAKLJUČAK

o privremenoj obustavi finansijske revizije „PRETIS“ d.d. Vogošća za 2019. godinu

Privremeno se obustavlja finansijska revizija „PRETIS“ d.d. Vogošća za 2019. godinu zbog nemogućnosti dobivanja revizorskih dokaza za izvršenje finansijske revizije u skladu sa Zakonom o reviziji institucija u Federaciji Bosne i Hercegovine („Sl. novine FBiH“, broj 22/06).

Provođenje revizije obustavlja se do sticanja uslova za njen nastavak.

Obrazloženje

Shodno Planu revizija za 2019/2020. godinu broj: 12-14-1884-1/19 od 1. 10. 2019. godine i Odluke o određivanju timova i rasporedu subjekata finansijske revizije za 2019/2020. godinu, broj: 12-14-1885-1/19 od 1. 10. 2019. godine, Ured za reviziju institucija u FBiH je aktom broj: 09-14-4-2265-1/19 od 9. 12. 2019. godine najavio prethodnu finansijsku reviziju za 13. 1. 2020. godine. Uz dopis za najavu revizije dostavljen je i Pregled potrebne dokumentacije za izvršenje prethodne revizije s rokom dostave podataka do 24. 12. 2019. godine.

Revizijski tim obavijestio je nadležnu rukovoditeljicu u vezi s okolnostima nastalim u periodu od najave revizije do planiranog datuma početka prethodne revizije, koje se odnose na nemogućnost dobivanja dokumentacije za obavljanje iste i nepridržavanja „PRETIS“ d.d. Vogošća sa odredbama Zakona o reviziji institucija u FBiH (u daljem tekstu: Zakon). Poglavlje „V. Ovlaštenje za prikupljanje informacija“ Zakona uređuje odredbe za prikupljanje informacija, te pristup prostorijama i dokumentaciji i revidirana institucija dužna je pridržavati se istih.

„PRETIS“ d.d. Vogošća nije u ostavljenom roku dostavio traženu dokumentaciju, a nemogućnost dostavljanja dokumentacije potvrđena je dopisom broj: AZB/20/20 od 9. 1. 2020. godine, pozivom na Zakon o zaštiti tajnih podataka i Zakon o proizvodnji i prometu naoružanja i vojne opreme u FBiH, po kojim ima zabranu dostavljanja podataka. Međutim, ovlaštenja data Uredu za reviziju u svrhu ili u vezi sa funkcijama iz nadležnosti, ne ograničavaju se ni po kojem drugom zakonu (član 41. i član 42. Zakona), a u slučaju sukoba ovog i odredaba drugih zakona u pitanjima uređenim ovim Zakonom, primjenjivat će se odredbe ovog Zakona (član 50.).

S obzirom na to da je nastalo ograničenje djelokruga revizije prije početka obavljanja prethodne revizije jer nije dostavljena zahtjevana dokumentacija, utvrđeno je da su ispunjeni uslovi za privremenu obustavu finansijske revizije. Nadležna rukovoditeljica, nakon sagledavanja svih činjenica, dala je prijedlog generalnom revizoru da se privremeno obustavi finansijska revizija „PRETIS“ d.d. Vogošća za 2019. godinu, do sticanja uslova za obavljanje iste.

Na osnovu svega izloženog, generalni revizor donio je Zaključak o privremenoj obustavi finansijske revizije „PRETIS“ d.d. Vogošća za 2019. godinu.

Dostaviti:

- Revizijskom timu
- Rukovodiocu Sektora za finansijsku reviziju javnih preduzeća
- Kabinetu
- Odjeljenju za pravne i opće poslove
- a/a.

GENERALNI REVIZOR
Dževad Nekić